

四庫全書

集部

欽定四庫全書

集部

止齋集卷十二

詳校官庶吉士臣龍廷槐

主事臣呂雲棟覆勘

覆校官主事臣李駿

校對官中書臣范鏊

謄錄監生臣黃嘉績

欽定四庫全書

止齋集卷十

宋 陳傅良 撰

內制

慶元改元詔

勅門下朕以眇身託于兆人之上惟日兢兢懼無以紹
列聖之休而對揚上皇之慈訓也永惟當今之務何者
為急非欲百官脩輔而民力裕歟夫親君子遠小人慶
歷元祐之所以尊朝廷也省刑罰薄稅斂慶歷元祐之

所以惠天下也是彝是訓歷年彌長肆于中興舉偏補
敝皆于此乎取法克至今日中外又寧朕幸蒙遺業繩
祖武而敢一日忘此乎掇取美號於紀元詩曰不愆不
忘率由舊章蓋庶幾周成焉其以明年為慶元元年故
茲詔示想宜知悉

哲文神武成孝皇帝梓宮啓攢塗奏告祝文

伏以兩楹啓殯六引徂東欲遷仍几之神以即因山之
吉敢先虔告用冀安行尚享

啓攢畢梓宮還殿皇帝行祭奠禮祝文

伏以厭世上賓終天永歎撤攢塗而即吉罄薄海以攀號
酹奠雖虔瞻言何及尚饗

發引前一日初更總護使行夜祭祀祝文

伏以三年之制念在終喪七月有期忍當明發共脩祭
事曷究哀悰尚饗

發引前期祭告錢塘錢清江龍神祝文

伏以於昭烈祖將祔思陵方六紼之問津維大川之借

助用伸忱請尚異明聽尚饗

癸引遷奠祝文

伏以仰止龍輶臨于邱隧方少須於筮日庶永安於賓
天昭告何云哀摧罔極尚饗

掩攢前一日奏告昭慈聖獻皇后徽宗皇帝顯
恭皇后顯肅皇后顯仁皇后高宗皇帝憲節皇
后攢宮祝文

伏以思皇烈祖往附諸陵當復土之及期願在天之垂

祐不震不竦以永萬世之歲來燕來寧如同一堂之上
尚饗

掩攢祝文

伏以遣車攸屆復土維新竟歲橋冢之衣冠莫覩堯天
之雲日永懷弗及隕越何勝尚饗

九虞祭祝文九

一虞

伏以稽山仰止想祖烈之攸宣清廟肅如悵神游之未

祔於茲易奠何以勝哀尚饗

二虞

伏以獻衣安在曷堪丹旄之思虞凡是憑尚系羹牆之念道周之薦海內如摧尚饗

三虞

伏以亘古永違貽孫謀之如在自今始吉嗟孺慕之何窮三薦既陳長號罔措尚饗

四虞

伏以信信宿宿暫安於神棲子子孫孫永懷於祖武方
舟而濟有淚如傾尚饗

五虞

伏以維堯傳舜俄同閔於衣冠自越入吳乃獨還于翬
衛望如弗及哀曷能勝尚饗

六虞

伏以念茲皇祖忍當昌歎之陳瞻彼昊天痛極胡髯之
逝恭迎仗衛疑對音容尚饗

七虞

伏以濤江限斷嘗攝事於攸司郊次森嚴方飭躬於斯薦扳依永已慟哭何云尚饗

八虞

伏以顧瞻橋冢已深萬古之歲想像衿衣尚御重華之舊反虞將畢追慕采新尚饗

九虞

伏以百神受職來奉於主車三后在天行升於祖廟哀

哉永訣忍此終虞尚饗

掩攢畢謝土神祝文

伏以於皇烈祖來祔思陵允惟百神襄此大事敢忘答
貺更冀明聰呵護之虔永永無斁尚饗

安南國王李龍翰加恩制

勅門下朕宣室受釐言念梯航之遠揚廷孚號載疏綸
綍之恩以昭烈祖之宏摹以篤介藩之丕祉推誠順化
秉信守義奉國履常懷德謹度思忠功臣特進檢校太

尉充靜海軍節度觀察處置等使兼御史大夫上柱國
安南國王食邑一萬戶食實封三千八百戶李龍翰恪
勤厥服紹美于前克提千里之封勿替累朝之好霜露
所墜固同洽于至仁滄海不波益良繇於多助維時嗣
服有事合宮亦遐想於彌恭莫共陪於肇祀駿奔在廟
雖阻脩黼黻之儀旅實充庭嘗與備蕭茅之享肆盼新
渥爰廣舊封裒載籍之名言侈元勲之顯號於戲閔予
訪落疇在公助祭之勞嘉乃象賢謹與國咸休之度於

馬申錫其尚欽承可依前特進檢校太尉充靜海軍節
度觀察處置等使兼御史大夫上柱國安南國王加食
邑一千戶食實封四百仍加濟美功臣散官勲如故主
者施行

賜徽猷閣學士太中大夫知襄陽府張杓辭免
改差知建康府恩命乞在外宮觀不允詔

勅具官某省所上表辭免恩命事具悉爾獨不聞故國
世臣之說乎而來諗疾也夫保墳墓孰與成先正之美

休祠館孰與圖累朝之報智者當有所擇矣式邁其驅
母事多遜所辭宜不允

賜文武百寮宰臣趙汝愚等上表請皇帝還內
不允批答

省表具之朕遭家多難懷乎懼不足以當大事賴天之
靈宗廟之祐迺者壬寅獲與同軌祔烈祖於思陵而遣
車徂東虞主未返仰止稽山明發不寐皇皇望望未知
所為也公卿百辟其何以慰朕而欲徇故常之請還廣

內乎方將稟命于上皇以供養仍九虞侍兩宮為事所
請宜不允

賜趙汝愚等再上表請皇帝還內宜允批答

省表具之夫會朝之器謹非所以示下宿衛之暴露非
所以持久朕豈不熟慮此歟但以任姒之養未忍違離
阜陵復土盍亦宿留是用却前請而勿聽也今承命三
宮皆曰不可百辟卿士又懇懇以為言朕惟捨獨見以
從衆允徇大權而勝私誼自古后王鮮不由此顧如冲

人其敢弗親尊之意抑臣庶而弗省乎所請宜允

止齋集卷十

欽定四庫全書卷

止齋集卷十一

宋 陳傅良 撰

外制

自紹熙四年
正月以後

皇后歸謁家廟親姪忠訓郎閤門宣贊舍人幹
辦軍頭司李孝純武經郎帶御器械幹辦皇城

司李孝友各特轉右武郎

敕具官某等朕惟古后妃有求賢審官之志而不私謁
而人主則特隆於肺腑之親夫惟后妃彌遜人主彌恩

斯可觀已日者吾后省家廟爾某皆以猶子祇服厥事
朕何愛一橫行郎而不以寵汝惟無忝爾祖以長守富
貴則予汝嘉可

皇后親姊故任武節郎閣門宣贊舍人致仕霍
漢臣妻平涼郡夫人李氏封成國夫人故任武
經郎致仕馬煥妻安化郡夫人李氏封信國夫
人忠訓郎關士廉妻彭原郡夫人李氏封崇國
夫人

敕朕惟古后妃有求賢審官之志而不私謁而人主特
隆于肺腑之親夫惟后妃彌遜人主彌恩斯可觀已具
位某氏夙以淑惠友于坤儀日者翟車還省家廟越來
相事禮無違者其益湯沐視君夫人尚服寵榮以綏壽
祉可

皇后親姪孫承節郎李瑜李璨各轉兩官

敕具官某等日者吾后還省家廟朕循故事推恩后族
自尊及平罔或遺者爾以幸會爰進二階豈不榮哉尚

務靖共以綏爾祉可

皇后親姪婦故忠訓郎贈文州刺史李斌妻安
人潘氏右武郎帶御器械幹辦皇城司李孝友
妻安人趙氏親姪女通直郎充點檢贍軍激賞
酒庫所幹辦公事韓松妻安人李氏並特封恭
人親姪孫孫女右武郎帶御器械幹辦皇城司
李孝友女孺人李氏特封安人

敕具位某氏朕惟古后妃有求賢審官之志而不私謁

而人主則特隆于肺腑之親夫惟后妃彌遜人主彌恩
斯可觀已日者吾后省家廟爾以猶子實來相禮朕嘉
與之用益汝封尚服寵榮以無違我齊家之化可

皇后親姪女夫通直郎充點檢膳軍激賞酒庫
所幹辦公事韓松特轉一官

敕具官某日者吾后還省家廟朕循故事且酌有司之
議推恩后黨而爾來自勲閤雅有能稱眷在甥館亦與
幸會至于增秩豈不榮哉尚務靖共以綏爾祿可

皇后親姪女之子從事郎韓大用大任各循兩
資

敕具官某朕惟古后妃有求賢審官之志而不私謁而
人主則特隆于肺腑之親夫惟后妃彌遜人主彌恩斯
可觀已日者吾后省家廟爾等迺以諸甥亦與幸會例
進兩階豈不榮哉尚服寵章無忘忠報可

皇后親屬進武校尉韓大有將轉承信郎

敕具官某日者吾后還省家廟朕循故事且酌有司之

議推恩后黨而爾以諸甥亦與幸會例進一階豈不榮哉尚服寵章無忘忠報可

皇后閣提舉官武功大夫帶御器械楊舜卿轉
觀察使

敕具官某等方周盛時后妃永懷賢士大夫僕馬俱病而不敢私謁於上徒欲為觴酒勞苦之而竟不可得慨嘆而已爾服勞宮閭迺以吾后有事家廟之恩至將廉車豈不榮哉而榮之周人何其幸也尚服寵章無忘忠

報可

皇后幹辦宅從義郎張友直忠訓郎沈植各特
轉一官

敕具官某等朕酌有司之議推恩后族而及其私人爾
等適與幸會各進一階其尚恪恭毋替爾事可

隨龍脩武郎閣門祇候兼皇后閣主管進奉表
佐額內翰林醫官太醫局教授王良佐成安郎
陳翊額內翰林醫官郭儀忠訓郎幹辦人船伊

昱忠訓郎主管文字傅昌時忠訓郎掌牋奏劉
玘忠翊郎主管進奉周良臣成忠郎掌牋奏黃
允文隨龍成忠郎浙西安撫兼准備將領主管
進奉趙友信成忠郎私名掌牋奏吳衍保義郎
王寧費師旦承信郎陳琪承信郎轉運司准備
差使王演承信郎魏嘉言承節郎薛拱承節郎
幹辦人船李祓進武校尉私名掌牋李大受該
遇皇后歸謁家廟並特轉一官

敕具官某等日者吾后還省家廟朕循故事且酌有司之議推恩后黨而及其私人爾等各以幸會至于增秩豈不榮哉尚務肅給毋怠其事可

秉義郎韓侂冑特授閣門舍人

敕具官某朕永惟舊相有勲勞于我家而其裔孫或蒙戚里之澤越在右階無以著見唯是試之後省以發其文官之上閣以華其選尚庶幾焉爾其懋哉用俟明陟可

皇伯太師嗣秀王伯圭合得冠帔一十五道並
特換封孺人賜親屬內欲將一名與故妻秦國
夫人妹宋氏封孺人

敕某氏古者疇勲賢之勞則及其私人況所尊敬自吾
壽皇以兄禮之者乎況其君夫人父之同產子乎以其
貤恩爵為命婦雖過於惠朕何愛焉可

閣門宣贊舍人游恭特授武德郎落閣職權發
遣臨安府兵馬鈐轄

敕具官某爾男爵也習於階兼之儀而不閑軍旅之事
非設官之意矣第其久勞優以增秩試移賓政往治戎
韜其務赴功以須器使可

起復武功大夫文州刺史興元府駐劄御前右
軍統制兼知鳳州郭諤特轉復州團練使令再
任

敕具官某朕以禁旅扞邊而擇將以撫馭之閑歲云久
西顧晏然方眷其勞就進戎團之峻尚難其代故遲瓜

戎之更爾其茂對新恩踐修舊績式嚴戎律兼緝郡條
朕不汝忘將有明陟可

皇兄沂州防禦使權王奉吳王祭祀多才磨勛
轉明州觀察使

敕朕崇長宗支以綿帝繫高爵厚祿宜與共之而猶計
歲課勞循次而進所以昭至公謹成憲也具官某信厚
以為質靖共以自將入不恃家人之恩而出無違于闕
庭之禮況以尊屬于今幾人則徑陟廉車誰曰不可而

必中有司之度積十年然後進之豈朕有所愛哉然而身無吏事之責秩比法從之崇其視匪躬盡瘁沒齒下僚者又何其幸也宜對殊渥無忝所生可

武功大夫和州防禦使權知閤門事兼客省四方館事韓侂冑特與落階官臣寮繳奏特與轉行右武大夫

敕嘉祐治平之間爾先正可謂社稷臣矣肆列聖寵嘉之施及子孫簡在戚里於焉尚主於焉納后凡可以熾

韓氏之門者無愛也具官某蚤以才稱荐膺器使庀職
上閭宣勞累年唯彼橫行賞典所吝獨以命汝庸示殊
恩一以懼慈福之心一以大忠獻之後蓋亦自勉庶穆
群言可

武功大夫集慶軍承宣使入內內侍省副都知
張安仁除入內內侍省都知武功大夫祁州團
練使入內內侍省押班李彥正除入內內侍省
副都知

敕具官某朕嘗稽之周制內宰隸於天官夫古道誠未
易復也至于建隆舊章尚有宣徽院之籍今亦廢矣而
別為北司則為之長者顧不當謹擇其人乎是用命爾
以肅禁中蓋親近之久識察之詳矣其益靖共以身率
屬毋使外廷謂汝不稱可

武功大夫和州防禦使帶御器械于惟脩武功
大夫明州觀察使帶御器械楊舜卿並除入內
內侍省押班

敕具官某自宣徽院之籍廢而北司之長蓋難其人朕既差擇之矣則參伍其間以相內治苟不有以自異于輩行而識風旨謹憲度者皆不在此選也然則爾名在四人之數蓋亦思報稱者哉可

張祐正係隨龍祇應勤勞特補承信郎

敕某日第攀附之勞而偶遺汝蓋累年于茲矣爰詔有司授之初官以見朕懷不忘疇昔可

武節郎御前祇應鄭孝友應奉有勞特轉一官

敕具官某服勞左右雖無顯庸閱日進官亦國之舊可
殿前指揮使左班年代上名劉成等十五人授
修武郎許元等三人授訓武郎御龍直上名方
正等三人授忠訓郎殿前指揮使左右班守闕
行門蔣榮十三人授從義郎東第一班上名婁
勝等四人授承節郎散直上名孟端等七人授
承信郎

敕某等饗衛士而遣之古也而命以官則彌恩矣往祇

吏職毋替忠勞可

皇弟右監門衛大將軍復州團練使多助皇弟
右監門衛大將軍成州團練使多能實及一十
年並該磨勘轉防禦使

敕具官某等朕崇長宗支以綿帝繫而猶計歲課勞循
次而進所以昭至公謹成憲也以爾靖共簡在近屬眷
焉增秩誰曰不宜而須假十年以中有司之度豈顧有
所愛哉以此風厲則為士者勸矣可

入內內侍省東頭供奉官降授寄資武功大夫
遙郡刺史霍汝翼轉歸吏部除帶御器械

敕具官某自以諸司使改今寄祿官而內侍與戎行雜
矣然而名不在銓曹之籍則猶非秩官是則異馬耳轉
而屬銓斯為寵渥爾其敬哉毋曰序進可

招箭班殿侍警彥澤在班及十五年補承節郎
仍舊存留在班祇應

敕具官某方罷遣衛士而次第官使之爾以藝成令祇

舊次宜益矜舊以須後思可

瀘州軍變守臣張孝芳被害特贈三官與兩子

恩澤

敕具官某朕觀春秋書盜殺某人夫謂之盜則非死者
之罪矣蓋喟然嘆曰士大夫或死于不幸而無所歸咎
者焉則其所遭之變非必有以取之此仁君之所務白
也國家閑暇士馬飽逸受命分閫尊重難危而爾曾無
咎端獨罹不測之禍夷考其治皆率故常則盜起帳下

非春秋之所不罪者與雖然世無叛兵久矣庸人為將高枕有餘爾以名流顧至於此恤典之隆豈但汝哀亦以使繼今者之知懼焉可

瀘州被害官兵故節度推官杜美贈兩資與一子下州文學故忠訓郎瀘州駐泊兵馬監押安彥斌贈三官與一子承信郎故下班祗應潼州府鈐轄司指使雷世忠贈承信郎

敕具官某等苟能効死于其長上皆忠孝之徒也瀘盜

之興爾等義不顧身各死於帥恤典之厚朕豈有所愛哉可

儒林郎前瀘州安撫司幹官郭仲傳失覺察本廳虞候張信為亂首亂作復與賊宴飲相為賓主特降三資放罷

敕具官某帥死于亂卒而爾為屬顧欲以卑調自全可乎削之三階尚用中典繼今有耻亦豈汝棄可

太史局測驗渾儀刻漏所學生周奕特補挈壺

正

敕某今官類非古稱謂而挈壺氏見於周官爾以諸生
馴致於此亦宜知所職矣可

修武郎閣門看班祗候霍寬夫供職實及二年
與落看班二字

敕具官某課其年勞正其名稱非徒以叙遷也由是而
釋煩辱之事則宜知自貴重矣可

部侍郎倪思訪修至尊壽皇聖帝聖政特轉一

官

敕昔者仲尼序書斷自二典以為堯舜揖遜之美後世弗可及矣矧惟我家父作子述不待倦勤親相授受蓋視帝者有光焉則聖政之作豈不足以匹休虞書哉具官某以折衷六藝之學發明心傳以同風三代之文揚厲治効作宋一藝垂之無窮及此奏篇朕為之序日上慈宸壽皇嘉焉藉使仲尼在宜如何表異之而有司以故事第賞爰進一官此朕之所甚不愛也可

祕書省著作郎黃由沈有開著作佐郎李唐卿
王容太常丞兼國史日歷所編類聖政檢討官
章穎將作少監黃艾並該修進至尊壽皇聖帝
聖政內黃艾係經修不經進各特轉一官

敕具官某等昔者仲尼序書斷自二典以為堯舜揖遜
之美後世弗可及矣矧惟我家父作子述不待倦勤親
相授受益視帝者有光焉則聖政之作豈不足以匹休
虞書哉爾等各以名儒載筆東觀作宋一藝垂之無窮

及此奏篇朕為之序日上慈宸壽皇嘉焉藉使仲尼在
宜如何表異之而有司以故事第賞爰進一官此朕之
所甚不愛也可

承信郎監潭州南嶽廟徐靖忠訓郎祕書省書
庫官盛端友訓武郎監祕書省門梁周弼翊郎
趙章該進至尊壽皇聖帝聖政各轉一官

敕具官某皆賞典也而他以待煩辱之勞至以隸書局
進官則稍寵矣爾尚勉思無忘忠報可

武功大夫降授昌州刺史帶御器械霍汝翼該
進至尊壽皇聖帝聖政特轉成州團練使

敕具官某鈐縶之勞繫學士大夫力也而無人乎其間
則安能關乙夜之覽今也奏牘來上俞音不遲慈庭有
懌冊府改觀是誰之助歟則以爾靖恭實與執事通達
中外其勞實多夫以文字得官皆德賞也進之遙刺誰
曰不可其尚勉思以圖忠報可

宗正少卿鄭汝諧奉使回特轉一官

敕具官某爾以老師宿儒銜命萬里修鄰好於北庭縉紳往往憫勞汝矣朕觀春秋使聘之際楚人欲傲晉叔向以其所不知而不能晉人亦曰鄭子產博物君子也而皆異其禮有以大國而微老師宿儒專對四方非所以令遠人見也迨茲歸報亶焉無闕而書勞進秩但循故事豈朕所以相勞苦之意哉爾其少休嗣有寵數可

閣門舍人兼皇子嘉王府內知客譙令雍奉使
回特轉一官

敕具官某擯上閣之儀聯朱邸之事皆華選也爾以趣
操文藻至于共二可謂吾親臣矣是用命爾介于膚使
銜命萬里修歲聘于北庭迨茲歸報亶焉無闕則朕所
以相勞苦之意何但循故事增秩哉有它掄用朕不汝
忘可

奉使親屬一員淮東安撫司幹辦公事譙令憲
准備差遣一員新監明州贍軍酒庫黃仁裕書
狀官一員新明州昌國縣主簿楊正臣指使將

仕郎葉時中將仕郎鄭如等回程各轉一官

敕具官某等凡出疆者有賞所以勞苦之也爾隸使事
與於驅馳迨茲歸報書勞進秩蓋國舊章朕豈汝吝可
閣門宣贊舍人宋克俊夏允言閣門祗候蔡唐
卿來處恭並該應舉人使十次賞各轉一官

敕具官某等贊儀上閣能與聘客周旋十不失一亦既
勞矣課効增秩蓋國舊章尚益靖共以須器使可

浙江潮神順濟廟善利侯祈禱感應特加忠靖

二字

敕某神朕固不為祕祠專鄉其福也至四方長吏有為
吾民請曰某山川之神能惠其境中則褒崇之典朕靡
愛焉以庶幾古蜡百神之義矧惟濤江近在寰內而有
司以報禮未稱將侈大之用錫美名以從民欲神尚終
惠使世世享可

袁州仰山神特加父母妃施子婦封號

敕某神等朕固不為祕祠專鄉其福也至四方長吏有

為吾民請曰某山川之神能惠其境中則褒崇之典朕
靡愛焉以庶幾古蜡百神之義惟仰山之神禮以王祀
而自江以西猶未慰滿是用推本父母施及子婦或隆
品秩或衍稱號朕所以寵嘉神貺以從民欲者如何哉
尚終惠之俾世世享可

知平江府沈揆奏五龍靈濟廟乞加封第一位
龍王封東靈侯第二位龍王封西侯第三位龍
王封中侯第四位龍王封南平侯第五位龍王

北寧侯

敕某神等朕雖不令祠官祝釐專鄉獨美至四方長吏
有為吾民請曰某山川之神能惠于其方則褒崇之典
朕靡愛焉以庶幾古蜡百神之義矧惟五龍以時節雨
暘功著近甸雖良二千石雅不言機祥而具道所以然
之故文詞爛焉爰錫命書秩以侯爵則所以寵嘉神貺
以從民欲者何如哉尚終惠之俾世世享可

懷安軍金堂縣進士黎崇禮年一百三歲遇大

禮恩特補迪功郎致仕

敕某昔在元祐合祭于園丘之歲而汝以生於今五朝矣朕方奉觴兩宮為萬歲壽迺如高年甚心羨之爰因郊賚登諸仕版以見吾貴老近親之意且以教天下之孝也可

翰林醫愈充重華宮擺鋪軍兵醫治兼臨安府駐泊看醫邢守中到官及二年轉額外翰林醫痊

敕具官某天官之屬六十而醫命士二十有八人周家之重醫也如此再歲無失爰進一官此又吾家法也往服明恩毋怠爾事可

止齋集卷十一

欽定四庫全書卷

止齋集卷十二

宋 陳傳良 撰

外制

正議大夫守給事中兼侍講尤袤除禮部尚書

兼侍讀

四年正月十一除禮書三月二十日兼侍讀二詞併行

敕方朕在東宮時嘉與僚友切磋經義緝熙光明肆以菲躬託于兆人之上克奉詒謀庶幾寡過永懷三益宜如之何具官某博極羣書折衷六藝凡與我言者于今

不忘也憫勞瑣闥位之春官進讀路門以竟餘論昔者
甘盤輔高宗于舊勞之時而無與于中興納誨之選至
漢二疏同傳太子而亦不在初元疇功之詔我有故人
始終典學視昔蓋有光焉爾其輔養精神陳古以誠今
惟毋以謝事之年而有遐心則朕以懌可

朝散郎試中書舍人兼皇子嘉王府翊善黃裳

除給事中兼侍講

四年正月十一日除給事三
月二十一日兼侍講二詞併

行

敕朕有元子出就外傳敷求其人蓋累年于此矣晚得
三益聰敬日聞間嘗侍燕從容能道二南之化朕嘉其
勞圖以自近具官某習先聖之術而闕于當世之務凡
與吾兒切磋言之者皆實學也是用擢之瑣闥勸講路
門冀發其蘊并以告朕昔四皓調護太子而不屈于高
帝李泌以布衣交肅宗而不能安其身于君側爾以西
州之彥出入宮邸為父言慈為子言孝是不謂之遭時
乎尚其殫竭以報簡知可

降授朝散郎許及之前任淮東轉運判官不覺
察闕錢降一官滿一期復朝請郎

敕某官日者淮錢多姦禁不以道有受其咎者矣爾其
以同過之仁而不言上亦從鑄級非所謂吏議乎閱日
既久宜還其初可

忠翊郎前韶州兵馬監押周昇在任不法降成
忠郎

敕具官某爾為兵官而州家以佚纍囚來訟雖會恩不

汝貸也其鑄一階以警慢事可

文林郎階州將利縣令蘭森改初驗因傷身死
人杜十四作凍餓身死失出犯公罪答該赦取
旨特降一資

敕具官某吏與吾民親莫如令爾尚不知其寃死也而
以為道殣曾謂與吾民親乎其鑄一階毋以恩免可

保義郎李珙家遺火燒民屋四百餘間有司自
來以屋直計贓坐罪得旨宣諭依條聽贖臣僚

上言特降一官

敕具官某傳春秋者有人火之說則無所歸咎之辭也
爾不戒于火而禍及於閭巷將安咎乎尚爾閤略其上
一官可

故通直郎趙公廣昨知饒州因旱歉民流臣寮
奏追兩官勒停男彥俠訴寃特追復承議郎

敕具官某左右諸大夫之言朕知其不如國人也爾守
畚中遭歲不淑能有惻隱之實而不為文具而達于朝

聽者皆反繆言者不置麗于佚罰而爾既賞恨于地下
今觀闔郡連編累牘哭汝甚哀蓋棺論定莫公于此朕
為憫然盡還舊官不但慰汝亦以勸來者之勤民也可
江西運副鄭汝諧奏奉議郎知袁州黃劬丁母
憂不肯離任倍支棺櫬喪服官錢等候服闋日
降一官不得與親民差遣

敕具官某爾嘗將母以就二千石之養垂及滿歲竟以
喪歸漕臣見劾侵紊郡計姑鑄一秩俾務省循尚蓋前

愆朕豈終棄可

承節郎盱眙軍指使潘撫權淮河監渡不職降

一官放罷

敕具官某邊禁之嚴而弛于汝免官醵秩以警後來邦
憲有常非我佚罰可

淮東運使趙師罕奏修武郎張世榮管押歲幣

公路恣橫生事降兩官送吏部與合關入差遣

敕具官某發幣於邊事關遠聽紛譁不靖使者有言閣

略弗懲人將是傲其貶兩秩且屬銓曹庶使邊臣繼今知懼可

湖北提刑張垓奏承議郎常德府通判趙善彥在任貪婪不法降一官放罷

敕具官某部使者所治且有良二千石焉爾丞郡顧不以治行聞而速官謗非朕所以獎用屬籍之意矣其貶一秩免所居官繼今有耻亦免汝棄可

知成都府邱宙奏奉議郎知成都府郫縣郭公

暮病昏垂謬降一官放罷

敕具官某夫不能勝其任矣而昏於酒黷於貨然而郡太守猶以為嘗有鄉曲之譽不寘于理鵠秩免官吾亦從薄罰焉其對隆寬益思懲艾可

睿思殿祗候寄資武功大夫入內內侍省東頭供奉官王師珪轉歸吏部差在京宮觀免奉朝請

敕具官某自以諸司使改今寄祿官而內侍與戎行雜

矣然而名不在銓曹之籍則猶非秩官是則異焉耳轉而屬銓斯為寵渥閔勞朝謁祿以真祠爾其敬哉毋曰序進可

武功大夫祁州團練使入內內侍省副都知李彥正武功大夫明州觀察使入內內侍省押班楊舜卿職事不謹各降一官

敕具官某等朕惟周制內宰掌王內之政令會其屬之功事而賞罰之今內宰不設而爾等不虔于事實干官

中之罰其上一官應古經誼繼今有悛亦豈終奪可

李彥正楊舜卿復官

敕具官某宥過無大況其細者乎爾以服勞不度嘗麗
于罰蓋八柄所以馭過者閱日滋久俾還舊官則予恩
茂矣其益靖共以圖報稱可

入內內侍省副都知李彥正除入內內侍省都
知入內內侍省押班楊舜卿除入內內侍省副
都知

敕具官某昔在周制內宰以中大夫為之而隸天官說者以為禁省之祕不宜屬外廷而本朝爰勅北司之長就擇明習靖共可以率屬者以董正之官最貴近亦不可不重其選矣爾自輩中進在四人之數曾未踰日能贊內治進之長官楊舜卿六進亞長官委寄彌重其益虔匪懈以報殊渥毋使外廷謂汝不稱可

親衛大夫清遠軍承宣使提舉佑神觀林憶年

除入內侍省押班

敕自宣徽院之籍廢而北司之長蓋難其人朕既差擇之矣則參伍其間以弼內治非識風指謹憲度者皆不在此選也具官某服勞禁近見謂老成茲用命汝秩在四人之數欲俾其屬于內肅給于外靖共則爾責重矣盍亦思報稱者哉可

皇兄故吳王府關奉利州觀察使多才上遺表妻令人高氏特封碩人

敕具位某氏朕所以賁爾夫于幽壤有加禮矣闕何愛

於疏封爾使居住皆寵光焉以塞其悲可

多才上遺表親弟二人乞比換南班訓武郎多
藝脩武郎多見並特授太子右監門率府率

敕具官某等朕以諸衛處宗室子俾日奉朝請非苟示
私也以爾多才身後之請及其仲季惻然重違之而並
命爾其務靖共以稱德意可

皇叔祖右千牛衛將軍不僂磨勘轉右監門衛
大將軍

敕具官某等朕考周官凡衛王宮者皆同姓也國朝簡宗英寘之環列之尹蓋循周制屬意深矣惟爾叔祖簡在衛中歷年彌長勞績兼茂進長禁闥職守益嚴欽哉無違以稱明陟可

皇叔祖太子右監門率府率不延特授千牛衛將軍

敕具官某以階官易環衛率視其秩日者有司故貶損爾今徹朕聞始仍舊貫雖曰緒正亦以示恩其尚恪恭

稱此密察可

武功大夫權主管侍衛馬軍司公事張師顏落

權字

敕具官某朕以金陵形勢襟帶江淮輟吾騎衛布之屯
所且以壯留鑰焉則統馭之才厥選艱矣爾以名將往
訓群驍方當無事士馬飽逸觀者咸謂可以即戎緬懷
武備於風駟鐵于雅車攻或庶幾焉緊爾之力肆用命
爾自攝為真班秩益崇寄任笨重其尚加懋以究爾功

俾周泰之詩得以專美則予汝嘉可

皇叔祖武德郎主管台州崇道觀不叟特換右
監門衛大將軍

敕具官某朕考周官凡衛王宮者皆同姓也國朝亦簡
宗英寘之環列之尹蓋循周制屬意深矣惟爾叔祖行
尊德修今在選中應于經誼宜率典常作宋恭先有馮
有翼則繫汝賴可

昭憲皇后親姪孫杜士寶特補承信郎

敕某朕惟藝祖之子孫自吾壽皇篤敘之恩備矣而于
母黨顧無世祿豈昌陵之意乎取之白丁授以右職爾
其永懷無忝所自可

右丞相葛邲初拜贈三代封妻

四年三月拜

曾祖朝奉郎致仕贈太師謚清孝追封魏國公

書思封魯國公

敕朕覽周誥至命君牙為大司徒實闕冢宰是謂股肱

而追本乃祖世篤忠貞之美蓋有感焉維今大臣相我

孝治經文緯武海內晏然則亦惟其先德之休足以燾
後可無褒崇以應經誼具官某故曾祖具官某躬行對
于古人鄉譽高于月旦方其筮仕亦既有聞而以其親
掛冠再調筦庫以此終身僅通閨籍法不應謚朝廷異
焉易名清孝足以發明其人矣燕及曾孫爰司宰事則
所以推本其美朕敢忘周道乎進封大邦莫如曲阜尚
食其報永綏爾神可

曾祖母魏國夫人侍其氏贈冀國夫人

敕周之盛至于既醉極矣其卒章曰君子萬年景命有
僕其僕維何釐爾女士釐爾女士從以孫子言周之羣
臣皆有士行之女以為之妃使生子孫足以傳世蓋天
意也具官某故曾祖母具位某氏作配君子行修于家
輩及曾孫迺生者哲考其世次亦足以知吾祖宗盛時
天意攸屬而豈一日之積一門之私哉假使當周之世
必從夫爵侑食五廟然則胙以大國秩之小君雖古未
有亦可以義起禮矣可

祖宣奉大夫顯謨閣待制致仕丹陽郡開國公
贈太師謚文康追封楚國公勝仲封齊國公

敕朕既本之六藝大啓爾宇以宏賁葛氏之祧則嗣有
令聞逮事兩朝申錫名邦亦禮之稱具官某故祖具官
某服某家聲踐脩累世濟以力學連由三科然而名滿
天下而位不過從班文字行于方來而身不完遠業惟
是一經之教被于聞孫蔚為名臣間我兩社則劬躬之
報可無異恩維此營邱太公舊宅是用即命以為新封

對我寵靈以昌爾祚可

祖母楚國夫人張氏贈夏國夫人

敕朕方廣念祖烈匹休于周假以溢我而收得賢之福
則所以尊大其家以答天貺豈顧有所愛哉具官某故
祖母具位某氏夙以懿行來嬪名家儀于前人以詔婦
子亦既再世熒然有聞而未艾之祥施于今相詩不云
乎樹之榛栗椅桐梓漆爰伐琴瑟種德彌遠歷年彌長
豈必皆身親見之乎報本醺勞式至今日大邦美號以

慰永懷非以為生蓋禮之稱可

父朝議大夫致仕贈太師許國公立方封越國

公

敕王室百年之間公侯將相故家布不失者有以文墨
論議綿及三葉是謂世臣固朕之所寵嘉矧予宗工尊
為禰廟者乎具官某故父具官某襟度粹然聲華籍甚
文未脫縈往往誦之一時英游莫敢輩行紹興之季歸
為從臣蓋其行藏皆可蹤跡用而不盡士論惜焉宜集

善聲發于賢嗣凡所著見孰非典刑爰侈舊封建邦於越以厚教忠之報以伸追遠之懷可

母雍國夫人樊氏贈陳國夫人

敕為吾股肱之臣則上自三世皆褒大之而況于其母乎御不及百兩養不及萬鍾也而無以慰滿其罔極之恩亦何以責移忠之報哉具官某故母具位某氏承休襲美發育自躬恩斯勤斯鞠我良弼雖及晏歲逮事舅姑旦莫敬共至忘櫛顙是足以成其子之令德矣改疏

上國之封以世世配于禰廟而今而後庶幾吾大臣之不廢蓼莪也可

故妻蜀郡夫人沈氏贈成國夫人

勅夫人起家以致爵位風人懼焉迺若克相夫子至于登庸嘗與之同隱憂矣而不同休顯此則又禮經之所悼嗟也具官某故妻具位某氏女德配於珩璜婦功著于蘋藻胡不偕老以須美成朕惟吾相裸于祔姑之室而副笄之服弗被翟茀之車弗乘也非有追寵何以慰

之乃闢新封以賁幽室可

妻魯郡夫人王氏封信國夫人

勅永惟二南大夫勞于王事而勉之以正勸之以義者
皆其家室也矧吾輔臣孤立一意佐佑乃辟是不曰警
戒相成之助歟具官某妻具位某氏自繼元配德音不
瑕既有芳猷進畀祖妣亦有雜佩施及朋侶佐我名臣
迄登三事聞譽日廣績用日崇則與夫汝水之墳南山
之側遭世不淑動心忍性者可同年而語乎冠于命婦

為君夫人我有茂恩宜不汝吝可

知樞密院事胡曾臣初除贈三代封妻

四年三月除

曾祖贈太子太保修已贈少保

勅昔周宣中興將相皆天下之選矣爰命皇父以整六
師而推本所以實南仲太祖之後爰作常武之詩朕甚
慕焉維今本兵得我碩輔則其宗祧可無衰崇以應經
誼具官某故曾祖具官某躬行對於古人德行高于輩
行而懷道不試士論惜之夫屈于名者享其實不發乎

其身者遺其後是宜燕及曾孫蔚為名臣久陪國論晉
長樞庭則追錄其積行之勤增華其種德之報朕敢忘
常武之詩乎陞班亞保以寧其神非以為生蓋禮之稱
可

曾祖母濟陽郡夫人黃氏贈崇國夫人東來郡
夫人張氏贈安南國夫人

敕周之盛至于既醉極矣其卒章曰君子萬年景命有
僕其僕維何釐爾女士釐爾女士從以孫子言周之羣

臣皆有士行之女以為之妃使生子孫足以傳世蓋天意也具官某故曾祖母具位某氏作配君子行修于家輩及曾孫遇生者哲考其世次亦足以知吾祖宗盛時天意攸屬而豈一日之積一門之私哉假使當周之世必從夫爵脩食五廟然則昨以大國秩之小君雖古未有可以義起禮矣可

祖贈太子太傅燮贈少傅

敕朕既本之六藝不愛高爵以崇報胡氏之祧則嗣有

令德休于後昆並命為孤亦禮之稱具官某故祖具官
某當天下之清得幽人之履世無孝廉之科而不偕于
計吏居無朝市之交而不聞于上國天命弗僭為之生
孫蚤為聞人遂專樞筦是不謂之劬躬燾後者乎申錫
命書班于次傳豈惟發潛亦勸來者可

祖母平原郡夫人王氏贈永國夫人

敕朕方寅念祖烈匹休于周假以溢我而收得賢之福
則所以尊大其家以答天貺豈顧有所愛哉具官某故

祖母具位某氏夙以懿行來嬪名家儀于前人以詔婦
子爰集慶善施于聞孫詩不云乎樹之榛栗椅桐梓漆
爰伐琴瑟種德彌遠歷年彌長豈必皆身親見之乎報
本醺勞式至今日大邦美號于禮為宜可

父奉議郎致仕贈太子太師宗贈少師

敕自蜀平至今二百餘年蓋西土無遺賢矣而尚有潛
德三世不逢詩不云乎何其久也必有以也具官某故
父具官某行著而晦於名才豐而畱于位乾道之際有

子熒然諸老先生見謂公輔吾壽皇駸駸嚮用矣而方
考槃阿澗永矢弗諼不以鼎來之養而易燕居之福匪
棘其欲卒為帝師殆所謂有道者乎然而生則遂循牆
之志沒則極告第之榮吾于大臣之親亦質之詩書無
愧矣可

母通義郡夫人鮮于氏贈信國夫人和政郡夫
人蘇氏贈和國夫人文安郡夫人王氏贈惠國
夫人

敕為吾大臣則上自三世皆寵嘉之而況于其母乎御
不及百兩養不及萬鍾也而無以慰滿其罔極之恩亦
何以責移忠之報哉具官某故母具位某氏承休襲美
發育自躬恩斯勤斯鞠我良弼蓋副笄之飾翟茀之華
一朝麟之不以為泰朕惟樞輔怵然永懷是用疏以上
國之封以世世配于禰廟而今而後庶幾吾大臣之不
廢蓼莪也可

妻大寧郡夫人康氏封安定郡夫人

敕永惟二南大夫勞于王事而勉之以正勸之以義者
皆其室家也矧吾輔臣孤立一意佐佑乃辟是不曰警
戒相成之助歟具官某妻具位某氏酒醪之所羞雜佩
之所贈皆天下賢傑也爰相夫子至于登庸經文緯武
績用甚茂則與夫汝水之墳南山之側遭世不淑動心
忍性者可同年而語乎冠于命婦為君夫人我有異恩
宜不汝吝可

迪功郎祕書省正字蔡幼學該修進至尊壽皇

聖帝會要轉一官

敕具官某載筆東觀迄于成書序進一階可謂德賞益修鉛槧以昌爾文二典三謨亦其選也可

忠訓郎武學博士李興時知融州

七月十三日

敕具官某簡在右學諸生咸曰賢哉吾博士也滿歲宜遷官而自詭治民將以其淑人者施之行事融在嶺表嘗建旄鉞而荆湖之與鄰視旁郡為善地爰以付汝是謂異數尚其懋哉以踐爾言可

高文虎除將作監丞

敕具官某朕旁招俊彥布列周行德進言揚如恐不及
矧子太史氏之舊引疾居家十有四年昔病今愈予環
可後乎爾博學篤志承伯父之傳網羅舊聞述史遷之
緒採之公論僉曰汝賢再轉為丞尚居繕監職務清簡
可以卒汗青之業毋以匠為嫌也可

武學諭范仲壬除武學博士脩武郎黃裳然除

武學諭

並七月二十一日

敕具官某等國家設武科以取士有周道焉所以貫革
之射息說劒指笏冕衣裳在西學則皆俊游也矧若爾
仲壬爾褻然人所亟稱者乎分以橫經之席從以滿戶
之屨雖甚寵異豈曰不宜可



止齋集卷十二

欽定四庫全書

集部

止齋集卷十三至
五

詳校官庶吉士臣龍廷槐

主事臣呂雲棟覆勘

覆校官主事臣李駿

校對官中書臣范鏊

謄錄監生臣黃嘉績

謄錄監生臣劉階

欽定四庫全書

止齋集卷十三

宋 陳傅良 撰

外制

和州防禦使殿前副指揮使郭杲除宜州觀察使

敕古者六軍皆以卿將元戎十乘以旌蔥珩二雅誦之庸示光寵矧我中權可無異數具官某鷹揚之勇輻湊之謀山西將家今纔一二疇勞屯所晉長周廬訓我羣

騶壯我中壘累歲於此士聽無譁日者貝冑三十來閱
庭內舍矢如破可以即戎朕圖爾功宜及懋賞枚數勇
爵峻極庶車禮均從班視古卿士是用命汝蓋周舊章
光對明恩益思忠報無使行狩專美車攻無使止居遺
恨祈父則予以懌僉曰汝諧可

武畧大夫侍衛步軍都虞候兼權侍衛馬軍司
職事閻仲持轉右武大夫忠州刺史

敕日者朕重冬狩之役又不欲乏武事也而為簡之師

試諸廷內於環列得師焉於步旅又得師焉皆可以即
戎朕甚嘉之具官某久於行陣積有戰多枚數壯士莫
與儔伍解胸山之圍殿符離之返至今言之令人矜奮
頃自遴選涖我師徒百夫千夫各習其教往往營壘廬
次之間無囂塵也於是閱也介冑堅好旌麾光明坐作
進退動中尺度朕惟勇爵以橫行為右階之最以刺郡
為遙領之始悉不汝吝用賞懋功其對隆恩益殫忠力
可

閤門看班趙弼奏祖故寧遠軍節度使侍衛馬
軍都指揮使贈太尉趙樽累遇郊祀登極未曾
陳乞加贈特贈開府儀同三司

敕朕永懷將閔克勤王家宣勞實多贈典有闕具官某
忠於許國勇不顧身能以衛社稷之心効於死封疆之
力戰自束髮觀者汗顏日者欲澄冗員嘗第元從閱實
數千人之衆定為十三處之功爾獨最聞朕尤嘉獎然
論報自昔雖峻極於武階而訟言有孫尚少虧於褒律

是用申命幽壤視儀上台以昭我不吝賞之功以成爾無遺恨之美抑使介士奮於戎行可

朝散大夫權刑部尚書京鏜無侍講

四年八月二十三日

敕朕與賢士大夫切磋經誼之日久矣而今加意於春秋春秋固為夷夏作也蓋聞在漢或申復讎之義或庶幾止戈之武而皆有大功號稱七制斷之經意孰得孰失朕將安所取此而誰與茂明之也具官某簡在法從蔚為名臣修聘北庭非禮勿聽往釐西事無言不酬斯

可謂據古而通今者矣進之路朝重席以待其為朕深探遺經之指與漢二君行事以佐取舍爾信不為章句學者而朕顧不能尊所聞歟往其懋哉以副延佇可

太中大夫權尚書吏部侍郎沈揆兼侍講

八月二十

三
日

敕朕與賢士大夫切磋經誼之日久矣而今加意於春秋春秋固為夷夏作也蓋聞在漢或申復讎之義或庶幾止戈之武而皆有大功號稱七制斷之經意孰得孰

失朕將安所取此而誰與茂明之也具官某紹興諸生
逮事高廟乾道博士見知慈庭於今士林鮮矣輩行而
況嘗與朕游舊乎進之路朝重席以待其為朕深探遺
經之指與漢二君行事以佐取舍爾信不為章句學者
而朕顧不能尊所聞歟往其懋哉以副延竚可

朝請郎右正言黃艾兼侍講

八月二
十三日

敕具官某諫臣朕所甚嘉與也廼者封囊朝奏而夕不
下則言者輒不自得豈朕意哉勸講闕負有司來諭庸

命汝艾切磋經術晉陪從班無所降殺豈惟以爾聞見博洽宜在選中亦使人人曉然知朕嘉與之意則繼此盡言不諱矣尚殫厥心以副延佇可

湖南提刑孫逢吉奏邵州獄囚死者二十餘人
守臣胡澄特展二年磨勘

敕昔在三朝每歲盛夏以一札賜郡長吏為奸獄丁寧也自長吏不奉此詔而吾民瘦死者滋衆爾某守邵亦以獄囚多死見察於部使者毋乃非朕寄元元之意乎

貶損年勞以示薄罰繼此領州無怠臬事可

文林郎邵州錄事參軍柴璿修職郎邵州司理
參軍李邠獄囚多死各特降一資

敕具官某爾為獄官而不省囚疾苦至多瘐死非所謂
士師不能治士者歟其鑄一階以警怠事可

太尉定江軍節度使興州駐劄御前諸軍都統
制兼知興州吳挺守本官致仕

敕圖任世臣盡護蜀將貔貅十萬不從中覆蓋五六十

年於此矣此意安在哉而欲致其事耶具官某性有忠
勇之資學有韜鈴之素寬我西顧賢於長城假以數年
庶底丕績而一旦以疾來諗願上大將軍印綬此朕所
以屏奏不省也雖然誦詩至於勤歸勞還詠歎辛苦則
古者遣將數日即休未有以獨賢久勞若爾然者朕豈
得不動於心乎姑徇忱辭使自休養若屬有疆場之事
強為朕起何以報我爾其勿忘可

故太尉定江軍節度使興州駐劄御前諸軍都

統制兼知興州致仕吳挺特贈少保

敕朕誕膺聖緒渴想賢勞方分託重之權尚阻勞還之
禮眷惟三世每興西歸既釜之懷胡不百年遽有東首
拖紳之恨可為震悼何以追榮具官某為今介藩視古
名將本之以鷹揚之勇濟之以輻輳之才越在江源而
不忘宗海之心既安蜀道而常為得隴之計是用倚以
大事付之全師永惟王室之中興皆有世臣而後濟維
周復古則召公是似之功維漢御天則耿氏獨隆之力

期爾晏歲對于昔人曾諗疾之亡何而告哀之已至朕方深念莫起於九原國有常儀率加之二等肆頒渙渥以慰沉冥晉陪亞保之班配食先王之廟噫有以勇爵至於朕左棘之華雖云愍章足以示前茅之勸可

持服前武功大夫祁州團練使吳曦持授濠州團練使起復

敕具官某有金革之事則三年之喪無辟自伯禽以來未之有改而況爾曦世為將乎移孝為忠朕所以強

起汝也又況蜀師十萬聽命爾家西陲晏然于今五紀
方圖前烈宜及後人則脫爾於寄祿之階授爾以戎練
之任豈以為利其母固辭可

提舉江州太平興國宮郭棣授利州觀察使致
仕

救憫勞將帥畀以真祠尚復抗章勇於忘祿重違雅志
俾遂歸休爰進崇階以勸廉退具官某奮自將種卓有
俊聲薦更轅門晉尹環列累歲於此六軍不譁方篤邦

交久無疆事關士雖倍戰功不多然中權屹然大敵知
懼繫卿之力簡在朕心所冀壯猷不忘王室胡為解組
遽此垂車豈非以行百里者末路之難而三世功名道
家所忌乎勉從忱請良咈眷懷尚服寵榮益綏壽祉可

故利州觀察使致仕郭棣特贈寧遠軍承宣使
敕聽垂車之請亦既永嘆聞易簣之言可勝遐想宜舉
恤典以醺舊勞具官某自束髮之初有衆尸之志方其
賈勇於宣威沙漠之間竟爾收聲當偃伯靈臺之後然

而我萬乘如周畿兵我有千廬如漢中壘舉以副托
究其設施歷年彌長課効為最往者以厭直之請踐更
千邊雖分州符亦以寄重反即祠館從其憚煩曾鳴劍
之未酬何挂冠之已決朕方有感德非忘杖杜之詩今
顧不然乃是迫桑榆之景覽此遺奏為之盡傷爰錫使
名視唐留務以華身後蓋國舊章其尚欽承用自寬慰
可

耶律古哩致仕

救有能厭殫毳之習蹈不測來歸我可謂壯士矣胡為
諗疾欲自便乎具官某恥事朔庭義不攜漢觀光中國
誓將滅燕蓋壽皇之所寵嘉而朕待之勿替者也夫鳴
劍之志未酬而挂冠之請已決豈以其兩國方歡賈勇
不售將退處以自娛暇乎抑膂力既愆自視非昔人而
不復感慤然也不然果疾病耶重違忱請聽致爾事若
以疾辭則豈庸釋可

耶律古哩贈官

敕挂冠有請良惻余哀華壙有恩蓋綏爾後具官某以
幽燕任俠之氣懷江漢朝宗之心萬里來歸甚欲宣威
於沙漠而兩君為好適當偃伯於靈臺竟爾收聲至於
賡恨蓋聞中外之分春秋所嚴有能擇衣冠於流蔡之
間而顧執干戈於社稷之役眷此壯志令人永懷爰疏
錫命之封庸示飾終之典尚歆殊渥以妥英魂可

正議大夫充顯謨閣待制提舉江州太平興國
宮陳峴磨勘轉正奉大夫

救夫循次非所以待勞能也計年非所以處法從也而有司以告重違舊章宜有命書且見明陟具官某以名臣之子自託於儒生以夕郎之官踐更於州組奉祠累歲益見靖共序進一官曾非特典朕不敢廢姑慰永懷可

合州赤山縣多山至道觀沖妙真人祈禱感應
加封沖妙靈應真人

敕具某神朕雖不令祠官祝釐專鄉獨美至四方長吏

有為吾民請曰某山川之神能惠其一方則褒崇之典
朕靡愛焉以庶幾古蜡百神之義今蜀部使者來言爾
神惠及闔境求之掌故則建炎之所表章也爰錫命書
申衍稱號所以寵嘉神貺以從民欲者何如哉尚終惠
之俾世世享可

潼川府中江縣靈威廟善利侯祈禱感應加封
善利敷濟侯

敕具某神朕雖不令祠官祝釐專鄉獨美至四方長吏

有為吾民請曰某山川之神能惠其一方則褒崇之典
朕靡愛焉以庶幾古蜡百神之義今蜀郡使者來言爾
神惠及闔境肅然古祠前修所敬吾民其嘉賴不忘也
爰錫命書申行稱號所以寵嘉神貺以從民欲者何如
哉尚終惠之俾世世享可

盱眙軍通判

闕四字

降一官

敕具官某爾為通守適掌北門之管姦民犯禁而莫之
禦顧欲歸罪於徼吏可乎其鑄一秩以為不事事之戒

可

武節大夫權發遣郢州任世安特轉一官再任
敕具官某往時三邊吏不數易滿歲無虞則增秩以寵
之蓋自建隆以來未有改也今爾乘障日有能聲爰進
新階仍紓舊組爾其益固吾圉以訖外庸杖杜勤歸之
詩朕豈忘之乎可

從義郎權知思州田祖嚴特轉一官

敕具官某昔爾以歸地進秩而有司繆誤仍年勞之舊

貫於焉正名以示懋賞其服今命益見寵綏可

履正大夫奉國軍承宣使提舉佑神觀鄧從訓
主管國信所任滿無違闕特授宣政大夫

救交鄰之禮於今為重自束帶與賓客言至於凡執事
皆所以覽示遠人以中國之有體也具官某昨長內庭
嘗發贅幣竟以明習曾無忒違隣好不渝亦緊爾力醺
勞滿歲懋賞崇階蓋國舊章朕豈汝吝可

朝散郎守司農少卿詹體仁除太常少卿

十月三日

敕具官某奉常惟禮樂是司而去古浸遠放逸尚多非
得博物洽聞學有根據者未易輕畀也爾少明經術務
為有用探蹟索隱恥一物之不知總餉之久蓋已由郎
省而貳大農矣召對雍容効忠無隱其為朕典禮樂之
事鐘鼓玉帛抑末也尚求其本而釐正之可

朝散大夫尚書戶部員外郎趙謐除軍器監兼

權郎中

十一月
十八日

敕具官某戎監之設本以嚴飭武備而休兵歲久繕修

之職各有司存長貳亦惟揔其凡而已以爾舊弼之孫克自抑畏久在郎省能寡悔尤序進為長仍攝民曹往其祇欽無替爾舊可

朝請大夫起居郎兼玉牒所檢討官兼權中書

舍人樓鑰除中書舍人

十二月二日

敕壽皇初策在廷之士蓋極一時之選矣朕閱名籍得為相臣者二人焉樞臣者一人焉從臣而下以聲績著見者迨不可枚數也具官某於是時嘗裒然為舉首而

偶不中有司之度然至今海內士所樂道議論文章風
流蘊藉則未嘗不在稱首也間者旁招時望寘之本朝
爾以攝官屬筆能道朕德意與其人才美之所宜文字
之上下簡書之長短皆足用勸而僉言不同往往不奉
吾詔仁者之勇見於封章肆用命爾為真詞披除書之
出國人皆曰賢詩不云乎假以溢我我其收之朕於是
蒙壽皇得人之福矣昔者鄭為辭命終屬國僑唐掌帝
制實先韓愈爾其懋哉稱此優異可

額內翰林醫痊李九齡轉翰林醫効

敕具官某天官之屬六十而醫命士二十有八人周家之重醫也如此矧爾服勞有以自見進之二秩視周命士往服明恩毋怠爾事可

判太史局吳澤荆大聲劉孝榮周端友職事不
謹各降一官

敕具官某等東方未明之作挈壺氏所以刺朝廷也朕夙興待旦而五夜之漏聲不肅是誰之咎歟各鑄一官

敬共朝夕母以為星官歷翁而弗汝察也可

秀州海鹽縣陳山龍王顯濟廟神母慶善夫人

加薦福二字

敕某神母朕既從二千石之言宏賁二子之祠維爾能與而予共福吾民郡人推本所自而廟食之可無寵嘉申衍稱號以大慰民欲乎可

賜進士出身宣教郎趙善防係濮安懿王近屬

更轉一官

敕具官某策士于庭而吾屬籍有以文克列于丙科朕
既異焉而問諸宗人則於濮園為近抑可嘉已申命一
官以勸胄子爾其懋哉務自著見可

宗子顯夫量試不中年四十以上特補承信郎
敕某國家所以待屬籍至矣不得雋於進士則有量試
不得雋於量試則有免試皆欲使之齒仕版習吏事也
爾其勉哉以稱朕意可

量試中宗子汝弼等八十一人補官

敕某等凡有司考校之科甚嚴密也而獨寬於量試宗子蓋欲使之齒仕版習吏事稍涉於文墨而不求其備爾等盍對明恩思所以自勉哉可

合格取應宗子時信等四十二人授官第一名
補承節郎餘補承信郎

敕某等有司考試之法至嚴密也而獨優於宗室子夫既闕畧以取之而授官與寒畯等則非所以示公姑屬右銓以須器使可

四川宗子師說等十人趣赴殿試不及並特補
承信郎

敕某等爾以宗黨越在西州嘗得雋於有司而道阻且
長弗獲與親策之選置而弗錄朕心惻焉亦授以官庸
示篤叙爾其懋哉可

宗子師鉉量試不中依近降指揮年四十以上
特補承信郎展三年出官

敕某有司考試之法至嚴密也而獨優於宗室子夫既

優矣而猶不應令徒以強仕予之初官然必使為三年之淹而後筮仕用示篤叙不為苟私可

宗子汝璽對策中間全寫御題首尾各用一段
湊成特降一官推恩補承信郎

敕具官某策士於庭而無以對宜不在第中以爾屬籍子而不求其備始命以官亦可謂茂恩矣可

廣東提刑李信甫奏朝奉大夫通判德慶府權
英州張公益失陷官錢科擾民戶特降一官放

罷永不得與親民差遣

敕具官某嶺表以去廷遠而吏不自愛往往淪胥而為欺削爾一秩且不得與於民社之寄苟自愛者繼此尚少懲乎可

忠訓郎趙師湧在任不職南劍守臣楊祐按罷輒敢伏闕妄論守臣特降一官仍押送寄居泉州拘管

敕具官某爾以屬籍試吏不自貴愛而見劾於州家亦

既虧吾教矣詣闕自䟽復繆失實鑄一官俾爾省循可
四川制置邱宙奏承直郎知叙州慶符縣魏良
忠侵刻夷人又輕入夷囿致殺死巡檢程仲乾
降一官放罷

敕具官某夷人畏廉而服威重爾為邊縣不足於斯二
者而致吾疆吏於死地免官鑄秩是不謂之寬典乎可
知成都府邱宙奏從政郎錄事參軍史定之不
親蒞獄致囚自刎死降一官放罷

救具官某夫為獄掾而弗躬弗親幽枉多矣囚致於自盡特其甚較著彰彰者也免官鐫秩是不謂之寬典乎可

文林郎婺州浦江縣丞趙大亨不遵依提刑司差委推勘公事輒申任滿離任降一官

救具官某士而不事事是欲素餐也爾方丞縣而再却憲臣之檄以自擇便豈非不事事歟按章來上姑鐫一秩繼今知懼斯可從政可

知萬州季圭奏脩職郎萬州司理參軍向紹祖
獄囚繫死降一資放罷

救具官某爾為獄官而不省囚疾苦至於墮指至於死
而不以告豈非所謂士師不能治士者歟其鑄一階以
警怠事可

止齋集卷十三

欽定四庫全書

止齋集卷十四

宋 陳傅良 撰

外制

慈福太皇太后冊寶書冊文官中大夫知樞密院事趙汝愚轉太中大夫

敕廼十有一月癸未日南至朕帥中宮從以婦子朝于重華獲陪親尊上顯號於王母永惟一朝四世非常之休則亦二三股肱克相孝治以輯威儀可無茂恩昭示

褒律具官某任重而道遠經明而行修累朝篤叙同
姓然自熙寧以進士對策而卿始以讜議冠羣英自治
平以儒臣本兵而卿始以雅望位三事卓爾大雅百年
而復見之朕甚嘉焉屬茲成禮盍圖爾功維昔太任儀
刑姜妣功在十亂德在二南於是周公推本聖子作思
齊之詩以歌之而仲尼定為六藝傳信萬世朕今逮事
過於成王翳闕二字曾不在周公之下疇勞進秩實應經
誼噫繼自今為闕四字陪朕歲上萬年之觴顧不偉

歟可

篆寶文官通議大夫參知政事陳騏轉通奉大

夫

敕廼者具法駕以日南至朝慈福宮壽皇拜乎前壽母
拜乎後朕帥中宮從以婦子摺圭稽首奉上寶章亦惟
輔臣克相鉅典可無褒律以示同休具官某直內而方
外博文而約禮及見故老在紹興文獻之間蔚為儒宗
極重華侍從之選眷言舊學簡在初潛所謂獨抱遺經

能斷大事者矣晉預機政益行所知俾予孝治度越千古蓋周頌大任而不及子孫逮事之榮漢尊長樂而不懈父母俱存之福洪惟我家一朝四世自有載籍未之前聞翳卿特書盡善具美噫朕式克至于今日休豈惟兩宮將高廟亦寵嘉之序進一官匪以為報可

前導禮儀使并奏禮畢通議大夫同知樞密院
事余端禮轉通奉大夫

敕日奉寶冊上之慈福也乘輿所過觀者萬人夾道率

皆歸美於朕躬朕豈敢專也則亦有宅心知訓之臣克
輯盛事可無褒寵用以示勸具官某直諒而多聞明哲
而匪懈蓋退然如不勝衣而道任天下之重謙鞠躬
而勇過孟賁矣從游潛邸陳誼最高晉翊鴻樞臨機必
斷朕嘉賴焉廼者導予有儀可象肆于竣事盍圖爾功
朕誦思齊之詩推尊文王本之太任於是蓋四世矣而
周公始作大雅考引功德以昭前人未必逮事王母親
周旋揖遜乎其間也以今況古孰與朕休如卿遭時亦

曰鮮儷繼自今卿其以予萬億年對天之休將書勞進秩不一而足焉尚其懋哉可

兵部尚書羅點母太淑人繆氏遇慶典恩特封齊安郡太夫人

敕朕觀魯詩頌僖公之有道及其壽母於以知吾卿大夫之賢其母氏不可以無報禮也具官某母具位繆氏克相君子種德云邁是生賢嗣為邦司直以點之議論風操過魯侯遠甚則爾母視魯夫人賢何如也義不貳

其夫而善祥集於晚年教行於子而淑譽聞於斯世肆
朕嘉與游錫贊書秩以小君疏封名郡抑與魯人請命
于周而後作頌者異矣尚服寵光以綏壽祉可

中書舍人樓鑰母太碩人汪氏遇慶典恩特封
太淑人

敕朕觀魯詩頌僖公之有道及其壽母於以知吾卿大
夫之賢其母氏不可以無報禮也具官某母具位汪氏
克相君子為名大夫是生賢嗣世濟其美以鑰之議論

風操過魯侯遠甚則爾母視魯夫人賢何如也爵雖從其夫而善祥集於晚年教行於子而令譽聞於斯世逮茲邦慶洵錫贊書抑與魯人請命于周而後作頌者異矣尚服寵光以綏壽祉可

參知政事陳騏子臧孫遇慶典恩乞進封其母敕日奉萬年之觴于朕王母嘉賴爾父爰進褒律而爾又以錫類之恩崇大其母膏沐之邑豈不榮哉具官某母具位某氏吾大臣內助也而及偕老方爾父夙夜匪

懈熙我庶績亦惟爾母整齊家事而後得以并意一卿
不懷其私則從夫之爵雖不以癸未詔書從事晉封名
邦朕何愛焉而況乎夫人獨得之也若夫可以久處約
於燈火之初可以長處樂於簪裾之後凡百命婦於焉
取式則此異恩又足用勸可

安定郡王子濤遇慶典恩轉官

敕維建隆磐石之宗澤流後裔維慈福奉觴之慶燕及
高年無二者以有言進一官而何吝具官某為今屬籍

視古典刑以孝恭友兄弟如周君陳以謹重率宗室如漢劉德至於試吏允也過人信抱負之不羣況行藏之無愧比觀掌故誰其逮事於四朝強起襲封茲謂慙遺之一老可以華國豈惟奉祠方欽想於達尊宜亟蒙於殊渥假如老老亡元日之詔書祇以親親亦盛時之恩意明揚進律晉陟承流其茂對於寵光用永綏於眉壽可

慈福太皇太后姪淮東總領吳玘特轉一官

敕具官某朕嘗從上皇後恭上慈福之冊親聆慈訓勉之以學至今心不敢忘也而施恩外家久不予決甚失朕意爰趣有司上之而爾某方饗淮師序進一秩以太后訓朕之意則爾亦宜自好修以成思齊太任之美矣可

吳璿

方令奉
常序進

吳玘

方分郡符
序進一秩

吳璿吳琯吳錡

寓直延閣
序進一秩

吳鈞吳鎰吳鑄

方為屬外臺
序進一秩

吳銓等一十二人

序進一官
浸即膺仕

燕榮等九人

各以姻聯
進官一秩

迪功郎前金州司戶青陽炳文年九十一遇慶

典恩特封承務郎

救具官某在易之晉受茲介福于其王母而朕身親見
之豈不盛哉餘慶溥將燕及人老俾爾晏歲齒于初官
尚服寵榮益綏壽嘏可

儒林郎御史臺副引贊官賈忱應奉上尊號冊

寶了畢轉承直郎

敕具官某典禮行於上而澤下逮盖廣愛之道也爾適幸會亦與進秩尚務肅給毋愆于儀可

朝散大夫軍器少監兼實錄院檢討官兼權考功郎官黃由除將作監兼嘉王府直講

十二月二十日

敕具官某朕有元子愛之固深而教之惟恐不至一時賓僚儒學之選爾以魁倫之彥久儀羣玉之府侃侃正色抗論不回自少匠而為長盖亦寵矣技巧精能非所

以望汝也橫經朱邸使吾兒有直諒多聞之益是惟休哉可

武德大夫帶御器械幹辦皇城司陳守忠係重華宮淑妃陳氏親父久在殿陛特與帶行遙郡刺史

敕具官某於重華為掖庭之親於廣內為屬鞬之列矧惟肅給濟以靖共出入兩宮而無違周旋四姓而不競爰疇勞於歲籥俾借重於州麾以歡庭幃以壯軒陛可

奉議郎太府寺丞曾三聘除祕書郎

十二月二十三日

敕道山蓬萊圖籍鉅萬士夫仰望真有飈車羽輪之隔
游其中者皆天下選也以爾力學自奮持論不阿憂國
之心如飢如渴擢自外府徑登清貫益讀未見書以昌
遠業且使四部秩然有序是為稱職哉可

大理寺主簿王寧新知信陽軍劉崇之並除太

府寺丞

十二月二十三日

敕寺監皆有丞而外府設官特詳焉蓋欲上裨版曹之

調度下托有司之出納不可以非其人也以爾寧文辭蔚然明習吏道勾稽棘寺平反為多爰俾序遷以躋勞勩爾崇之聲稱籍甚蚤登著庭出守邊方召對尤敏使還朝蹟以慰公言所貴於儒者謂其能通世務以其所學見之事功勉哉可

朝散大夫王進之知德慶府

敕具官某爾頃以天府貳車往守武陵突不得黔已復報罷朕心憫焉晉康雖遠實高皇興王之地舉以授汝

以觀汝能尚其懋哉毋替朕命可

張某知宜州

敕具官某自桂林以南之州宜為大其與蠻人隣也宜為邇置候固圉重於他邦舉以付爾不謂之選擇而使子歟尚對明恩無乏邊事可

朝散郎充顯謨閣待制無皇子嘉王府翊善黃

裳無侍講

五年正月
二十日

敕朕每歲仲春詔諸儒講路門將修故事有日矣比覽

名籍為之矍然昔者所進今安在耶而不為予講也具
官某以六學之醇長於勸誦嘗發明春秋之旨纚纚可
聽也何恙不已而憫勞以大夫之事但與吾兒游乎夫
文帝能前席賈生於久不見之餘而武帝不能留汲黯
於出入禁闥之日兩君治効較然可覩爾不當起為予
講耶詩不云乎素絲祝之良馬六之彼姝者子何以告
之此朕所以責望汝也可

從政郎建康府江寧縣尉趙汝章收使射賞轉

文林郎

敕具官某澤宮不建士無射御之習壽皇以為此非所以合文武也既策之廷中復取之囿闕於此皆得雋焉士亦艱矣俾進一階用為如吾詔者之勸可

降授朝奉郎權通判建康府徐堯任國子博士
日奏對失儀降官特復朝散郎致仕

敕具官某闕庭之禮陵三軍者懼焉以其嚴也爾為博士長而進對失容至於鑄秩朕豈深咎爾耶丞郡亡何

聿來致事母乃謹畏過自刻責乎俾還舊官示棄前咎
則朕之遇士大夫明恕無矣可

福建提刑盧彥德奏泉州同安縣尉鍾安老增
強盜希賞本州錄事叅軍從政郎鄭繼功符同
結錄更不駁正繼功特降兩資放罷

敕具官某捕盜之賞建隆舊章也比歲吏緣為欺往往
傳會得官縉紳數以為言而重改作將以待實能焉爾
汝治其獄迺不審察竟以傳會之辭上之州家士師不

能治士非是之謂歟其削兩秩仍免居官尚務省循以
蓋前咎可

前提舉廣南市舶江文叔容縱押綱官移易香
綱錢物特降一官

敕具官某建隆舶司蓋長吏無之尋以為有遺利也而
專置使亦稍密矣爾領其事迺以貢輸屬汙吏然則何
賴焉削之一官以為不謹所使者之戒可

知建康府余端禮奏武經郎李存道和糴淮西

總領所米般量少欠降一官

敕具官某時糧以省漕此大事也而爾不究心至見劾於帥聞爰奪一階以警怠事尚其省循冀不終棄可

入內侍省東頭供奉官毛居實轉歸吏部授從義郎

敕具官某爾自謫籍得歸銓曹命之秩官往護陵寢其對恩渥毋忘懼思苟無後愆亦豈遐棄可

新知錢塘縣趙盛婺州通判吳璫並除職事官

三月二

十一日

敕具官某等維昔忠獻光輔高宗以建我家維今太皇
實佐求賢而無私謁天下誦之則以爾盛忠獻之後璫
太皇家人也靖共在位克世其美而寘諸周行以勸勲
戚不亦宜乎可

大理少卿許及之奉使回特轉一官

敕具官某昔臯陶明刑能弭猾夏之患爾吾諫臣也而
為大理稽經傳古人自不寃非所謂叔問如臯陶者耶

銜命北庭且以覘國朕所為用汝也肆于歸報疊然獻忠蓋歷道其所更見至於禾黍而未嘗一語及僕馬之病朕聞之有感焉書勞增秩是特舊章若屬有鄰國之大事爾其選哉可

閣門舍人蔣介奉使回特轉一官

敕具官某使於四方孔門以為難是可以觀士矣爾以西州之彥庀職上閣意象容止亶如儒素蓋其所趣尚然也屬修隣聘以爾輔行肆于歸報禮無違者書勞增

秩蓋循舊章欲究爾能嗣有晉寵可

帶御器械蔡必勝除知閣門事

敕具官某昔者仲尼設科可使束帶與賓客言者皆高弟也矧吾上閣四方於此乎觀禮而可不用士乎爾以諸生習孫吳對策為天下第一操履趨尚學士大夫也壽皇嘉之駸駸膺仕朕方在潛邸每視朝輒屬意汝以為可在左右肆我嗣服首加趣召俄而銜恤迺今來歸是用命汝典我閣事夫不以寒素處私人不以學問望

右列其來尚矣自我作古追復仲尼之遺意爾其懋哉
以圖忠報可

朝奉大夫試尚書禮部侍郎倪思復薦舉不當降
一官滿一期叙復朝散大夫

敕朕維聽言信行雖高第不保其終身觀過知仁則寬
朝宜諒其本意爰棄前咎俾復故官具官某蔚為國華
簡在法從久居臺閣蓋習於推轂之風樂道縉紳亦恐
有積薪之恨云胡吏議及此上聞迺不知猾吏之為而

徒錄名臣之後或者愛博至於言私雖薄示懲章豈遽
忘於善類思皇多士朕所以舍舊而圖新求備一人爾
毋為矯枉而過直可

降授通議大夫顯謨閣待制提舉江州太平興
國宮陳峴薦舉不當降一官滿一期叙復通奉
大夫

敕朕維聽言信行雖高第不保其終身觀過知仁則寬
朝宜諒其本意爰及改歲俾還故官具官某屢典名藩

久持從索以公卿大夫之後雅有扳援則門生故吏之多豈皆決擇沉重以名家之好則忘其贓狀之非及此上聞掛於吏議既往不咎朕所以舍舊而圖新永矢弗諼爾母為矯枉而過直可

顯謨閣學士降授通奉大夫知建康府鄭僑舉
淳安令舒光改官不當降一官滿一期叙復正
議大夫

敕具官某淳安令之獄至今人疑之朕徐考其所為主

則皆吾賢卿大夫也吾賢卿大夫也而坐以繆舉之罰
母乃已重乎以爾經明行修為海內所稱數而閱天下
之士多矣門生故吏必善推擇而不苟取迺者所舉令
其具如刑書邪則與其進不保其往孔子有是言矣不
如刑書則是即墨大夫也豈以微文而廢善類爰棄前
咎俾還故官其繼自今毋以精失士之意益舉所知是
謂忠報可

朝請大夫中書舍人樓鑰磨勘轉朝議大夫

敕計日非所以處賢才也書勞非所以待法從也而有司以功令來上曰某人當進其官則朕亦重改焉耳具官某以文墨議論方代予言自吾與丞相執政進退羣臣當不當功罪爾皆得以可否是正于其間分職授任亦異於百辟矣績用益彰聲望益茂則等而上之不過三數官皆將以待汝何屑屑以課日月增秩為事尚服訓辭以須明陟可

曾某知嚴州

敕具官某贛川之曾人物相望仕至二千石者前後以
十數厥聲茂焉爾習于家傳有志於古試以郡寄有志
於民還奏便朝嘉其詳練惟嚴陵之輔郡實高廟之潛
藩分以左符用撫吾民由小州得大州益勉厥職以大
爾家可

林大中磨勘轉官

敕計日非所以待賢能也循次非所以優法從也而有
司以功令告是為舊章庸可廢乎具官某以直道正臺

綱至于累朝以勇退紆州組殆將終更槩之懋官一階
不足酬也況夫訓詞深厚駁議剴切朕甚嘉之乎而有
司會課姑惟增秩其尚欽承以須殊獎可

奉國軍節度使開府儀同三司充萬壽觀使夏
執中所生母郡夫人沈氏贈崇國夫人

敕詩人誦后夫人之賢必以為某人之子之孫之甥之
妹蓋推本其所從來不一而足也具官某所生母具位
沈氏作配名門雅有淑德是生賢嗣為國元舅日者朕

緣申伯之誼加錫命數視儀鼎司夫寵其身而不及其
母豈所以宏賁外氏之祧乎是生不需膏沐之賜而死
無以慰蓼莪之思也爰自郡封陞華上國尚歆明恩永
綏爾後可

故妻郡夫人諱氏贈寧國夫人

敕公卿將相處貴倨之勢而不驕非獨其身賢也警戒
相成厥有內助具官某故妻具位諱氏嘗為吾舅氏之
配與之共隱約矣今以吾舅申錫命數視儀鼎司敬共

不違退若初筮推本所自非有如齊風雞鳴之配然耶
夫生有中饋之勞而不及從夫之爵死祔於姑之室猶
未離於郡小君也則吾外氏之祧尚有遺恨晉陟上國
庸慰幽冥尚歆明恩益相夫子可

止齋集卷十四